

FEDERICA ANGELI

# Universitât dal Friûl virtuose: e dal Stât a rivin plui bêçs

*La riforme pe Universitât e scjasse il mont dai ateneus,  
dai giornâi e dal Web. Triest al à di sistemâ i belançs*

I valôr de Universitât dal Friûl, de só ufierte didatiche e de maniere cemût che al ven giestit il belanç a son stâts ricognossûts a nivel ministeriâl, e i sfuarç fats a son stâts premiâts cuntun «bonus» di 1,5 millions di euros di finanziament. La gnove e rive ae fin di Lui e subit e scjasse il mont dai ateneus, dai giornâi e dal Web.

**GNÔFS CRITERIS**— Pe prime volte, il Ministeri al à metût in vore un criteri che si fonde su la qualitât par distribui i fonts aes universitâts talianis: chei dulà che la qualitât de ricercje e de didatiche a àn nivei plui alts a saran premiâts. Il 7% dal Font di finanziament ordenari al è stât distribuit daûr di chescj criteris; 27 ateneus si son cussi dividûts i 525 millions di euros che a costituissin il font. Cjalant la graduatorie

si pues jessi braurôs dal novesim puest de Universitât dal Friûl, daspò di mês di polemichis sul stât dal so belanç e sul so sotfinanziament cronic di bande dal stât. E pues pardabon jessi contente la retore Cristiana Compagno, che e viôt ricognossût il sfuarç fat in chescj mês: cuntun sotfinanziament di passe 100 millions di euros, a son stâts fats meracui. Di fat la Universitât dal Friûl e je tai prins puesc in dutis lis graduatoriis che a valutin i risultâts otignûts in rapart ai mieçs a disposizion.

**SOSPENSION PAR TRIEST**— Dongje di cualchi presince «scontade», no mancjin però lis sorpresis. La prime e je la sospension dai finanziamenti aes universitâts di Triest, di Firenze e di Siena, in spiete che al sei presentât un plan finanziari par sistemâ i



belançs che, a vué, a risultin in ros. Il retôr dal ateneu di Triest, Francesco Peroni, al à dit daurman che si cjatisi devant di un fal che al sarà sclarit in curt, dal moment che il belanç al è in atif. Il probleme però al è leât aes spesis pal personal, che a àn superât il limit dal 90% dal finanziament fissât dal Ministeri, e che, in plui di escludi l'ateneu de spartizion dai fonts, al ten fermis ancjemò lis assunzions almancul fin al 2011. Une biele gnove pe universitât furlane che, magari cussì no, e à simpri di difindisi dai atacs che i rivin di ogni bande, dispès ançje des istituzions che a varessin invezit di difindile.

## LA SCRIFE

### SPIETANT L'ANIVERSARI

Leç 482/99: 50 agns par fâle nassi, 10 agns par copâle... cuant che si dîs la eficience taliane!